

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-00561-2014
Broj akta: 01EH-001
Gračanica, 27. 02. 2014. godine

Z A P I S N I K
SA 16. SJEDNICE OPĆINSKOG VIJEĆA
GRAČANICA

Održane dana 30. 01. 2014. godine u sali za sjednice nove zgrade Općine Gračanica, sa početkom u 13.00 sati.

Sjednici je prisustvovalo 26 članova Općinskog vijeća Gračanica. Odsutni su: Gadžić Rahim, Selimović Senad, Topčagić Mirzet i Hasić Mujo.

Sjednicu je zakazao i istom predsjedavao Edin Ibrišević, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća Gračanica sjednici su prisustvovali i: Općinski načelnik Nusret Helić, savjetnik načelnika za odnose sa javnošću Azra Mustajbašić, općinski pravobranilac Jasminka Imširović, šefovi službi za upravu Senaida Šaković, Aida Hodžić, Mustafa Bajić i Zijad Dedić, izvijestilac Safet Ibrahimović komandir Policijske stanice Gračanica, te predstavnici sredstava informisanja.

Zapisnik sa 15. sjednice Općinskog vijeća Gračanica usvojen je jednoglasno sa 26. glasova "ZA".

Sjednici je pristupio Senad Selimović pa je u tom trenutku bilo prisutno 27 članova Vijeća.

Pitanja i inicijative kandidovali su sljedeći vijećnici:

Fadil Mešić:

"Imam jednu vijećničku inicijativu upućenu Općinskom načelniku. Stanovnici naselja Malta-Pašalići pokreću inicijativu za promjenu ili dodjelu novih naziva ulica u naselju Malta-Pašalići. Naša inicijativa se zasniva na zaslugama boraca iz naših naselja koji su dali svoje živote za odbranu Bosne i Hercegovine. Njih je ukupno devet. Molim Općinskog načelnika da razmotri ovu inicijativu stanovnika navedenih naselja i kada to dođe na red da je i realizujemo."

Ibrahim Hasić:

"Ja imam jednu inicijativu i jedno vijećničko pitanje. Inicijativa je upućena načelniku općine gosp. Husretu Heliću:

- Podnosim inicijativu Općinskom načelniku da se za sjednicu Općinskog vijeća Gračanica u februaru 2014. godine pripremi izvještaj u kojem će se detaljno prikazati uplate iz budžeta Općine prema mjesnim zajednicama u 2013. godini za javnu rasvjetu, sa detaljnim mjesečnim uplatama za svaku mjesnu zajednicu, te brojem sijaličnih mjesta u svakoj mjesnoj zajednici plus grad naravno.

Obrazloženje: S obzirom na dogradnju javne rasvjete u 2012. godini, iz MZ-e Malešići je blagovremeno otišao dopis u kome su nadležne općinske službe obaviještene o proširenju (broj akta: 01-43/12 od 25. 10. 2012. godine) kako bi se mogao planirati adekvatan iznos za finansiranje potrošnje javne rasvjete. Međutim, raspodjelom sa stavke javna rasvjeta u mjesnim zajednicama u

toku 2013. godine, nije obuhvaćena navedena dopuna mjesečnom tranšom za potrošnju rasvjete (45 sijalica x 55,65 KM = 2504,15 KM na godišnjoj osnovi) ili 208,68 KM mjesečno. Takođe u novembru 2013. godine mjesečna tranša za potrošnju javne rasvjete umanjena je za 60%, te ukoliko i decembar bude umanjena u istom iznosu to će ukupan dug za MZ-u Malešići iznositi 2476,64 za novembar i decembar. Sveukupan dug za dograđenu javnu rasvjetu i neisplaćenu punu tranšu za ova dva mjeseca iznosi 4980,79 KM. Da ne bi bili ni na nebu ni na zemlji, želimo da to znamo tačno za svaku MZ-u.

Vijećničko pitanje je naslovljeno Ministarstvu nauke, obrazovanja, kulture i sporta TK i Karate klubu Gračanica.

- Da li je Karate klub Gračanica privatni ili je udruženje građana?
- Ako je udruženje građana zanima me kada je bila izvještajna Skupština, a kada izborna?
- Da li udruženje ima izvršni organ-Upravni odbor?
- Kada je biran predsjednik Kluba, na kojoj izornoj skupštini i do kada mu traje mandat?

Obrazloženje: S obzirom da moji članovi porodice unazad 12 godina aktivno treniraju u Karate klubu, nisam nikada bio prisutan Skupštini, izvršnom odboru ili sastanku nekog drugog organa Karate kluba. Ukoliko bude udruženje građana treba ga nastaviti finansirati iz budžeta. Ako je privatno, treba ga prestati finansirati iz budžeta Općine i Kantona.”

Almedin Devedžić:

“Ja imam dva vijećnička pitanja. Prvo pitanje upućeno Direkciji za puteve TK.

- Da li je putni pravac Gračanica-Mališići-Lukavica bio tema ovih aktivnosti, koji je njegov trenutni status i da li će se njegov status iz općinskog putnog pravca mijenjati u regionalni putni pravac mreže puteva TK?

Obrazloženje: Putni pravac Gračanica-Malešići-Lukavica je jedini putni pravac koji u okviru općine Gračanica povezuje mjesnu zajednicu Lukavica sa centrom općine, a mjesna zajednica Lukavica je jedina mjesna zajednica u općini Gračanica koja nije saobraćajno kvalitetno spojena sa centrom općine. Napominjem, ukoliko bi se ovaj putni pravac proglasio regionalnim i kvalitetno saobraćajno riješio stvorila bi se putna mreža kojom bi se ovaj putni pravac naslonio na regionalni put Doboje-Modriča, odnosno Doboje-Sjenina-Paležnica-Međida-Gradačac, što bi uveliko skratilo i ubrzalo kretanje stanovništva ovog dijela Dobojske, Gračaničke i Gradačačke regije. Molim nadležne iz Direkcije za puteve TK da mi odgovore pismeno na ovo pitanje.

Drugo pitanje je upućeno Službi za poduzetništvo i razvoj i glasi:

- Kada će se završiti izgradnja puta u mjesnoj zajednici Lukavica u naselju Zolje na potezu Zolje-Omerčevići koji je započet 2012. godine, a finansiranje istog završeno u 2013. godini?

Obrazloženje: U toku 2012. godine u mjesnoj zajednici Lukavica u naselju Zolje, izvršeno je asfaltiranje puta Zolje-Omerčevići u čijem dijelu finansiranja su učestvovali i građani. Na zahtjev grupe građana skrećem pažnju potpisnicima ugovora o izgradnji ovog puta da ugovorene usluge nisu izvršene, odnosno nije završena izgradnja dogovorenog dijela puta. Napominjem da je došlo do odronjavanja asfalta jer ne postoje bankine koje su projektom predviđene. Nudimo da izvršite, ako to već nije urađeno, tehnički prijem puta. Molim nadležnu službu da me pismeno izvijesti o aktivnostima koje su preduzeli na rješavanje ovog problema.”

Esma Paašić:

“Za današnju sjednicu postavljam jedno vijećničko pitanje nadležnim službama, a odnosi se na rasvjetu u ulici Bosanskih kraljeva (tačnije kod Elektrodistribucije). Kada se može očekivati da se pomenuta rasvjeta završi i da se radovi privedu kraju?

Obrazloženje: Smatram da bi bilo dobro postaviti rasvjetu na navedenom mjestu i molim dakle, radno predsjedništvo da se uputi inicijativa prema nadležnim službama Općine Gračanica, kako bi se rasvjeta postavila što prije.”

Na pitanje je odgovor dao Sead Gazibegović, rukovodilac Elektrodistribucije Gračanica, naglašavajući da je javna rasvjeta u toj ulici već u funkciji.

Safet Pjanić:

“Ja ću imati par inicijativa i možda jedno ili dva vijećnička pitanja.

Prvo želim da Općinsko vijeće uputi dopis Elektrodistribuciji Sarajevo, Poslovnici Tuzla vezano za bahato ponašanje nadležnih službi kada je u pitanju plaćanje utroška električne energije, odnosno da opomena dođe prije nego što dođe računa za struju i to ljude iritira i boli, te na kraju to ljude malo i ponižava. Pored toga što dođe prije opomena, oko dvadesetog, dvadesetpetog isključenje, a konkretan kupac u zadnjih dvadeset godina uredno plaća struju bez dana kašnjenja i svaki mjesec cca četrdesetak hiljada maraka. Pored toga, na tom računu ima zatezna kamata, normalno da je to predmet ugovora, gdje po meni treba isto da se pitamo da li to treba da bude na računu, je li to bankovska institucija ili je to elektro-policijska distribucija i da li zaista treba to raditi građanstvu, pogotovo ljudima koji duguju za struju, i to su prijetnje, a priključak košta 30.00 KM. Vijeće treba da se obrati nadležnim službama i da kaže da je to bahato ponašanje, na momente drsko, prijeteće, bez ikakvog socijalnog senzibiliteta, socijalne osjetljivosti itd. itd. Neću govoriti o cijeni struje, o primanjima u Elektrodistribuciji. O tome ćemo govoriti, ja se nadam prije oktobra.

Drugo, želim isto tako da ovo vijeće uputi dopis Ministarstvu za promet i komunikacije, Federalnom ministarstvu za promet i komunikacije u Sarajevu vezano za izdavanje dozvola za međunarodni prevoz robe. Naime, evo o čemu se radi. Naši prevoznici sa općine Gračanica dobijaju, da kažem jedva knap dozvole za prevoz robe koji vrše na tržište da kažem cijele Evrope i prevoznici koji uredno rade za Fortunu dobijaju dvije cement dozvole, to su godišnje dozvole i dvije pojedinačne dozvole koje samo u slučaju kvara može da se interveniše za prevoz u Evropu. Mi smo imali slučaj skoro da idemo u Goricu sa kecijem jer nismo imali dozvolu, što bi trebalo da bude tako prohodno i tako transparentno da se ne treba čekati ni jedan dan da se da dozvola onoliko koliko treba. Po oglasu, po konkursu, znači da se da što je moguće više dozvola, bar kad je u pitanju ova regija i naš kanton. Dobijaju drugi daleko i puno više toga, ali to je uglavnom Hercegovina itd. itd. Znači inicijativa je da se dozvole dodjeljuju što je moguće brže, a moramo svima onima koji ispunjavaju za to uslove, pogotovo pojedinačne dozvole za koje ne treba nikakva barijera.

Treće, da se uputi jedan dopis Ministarstvu unutrašnjih poslova Tuzla, odjeljenje za strance da se pokuša s našom inicijativom postići što je moguće transparentnije i brže izdavanje boravišnih dozvola. U Fortuni konkretno svaki dan ima deset stranaca i prije pet dana došle su dvije inspektorice Olja i Nataša i maltene hapsile ljude. Želimo svi da stvorimo ambijent u Bosni i Hercegovini da privučemo strance, strane investicije i strani kapital što smo mi evo i privukli i dobili, a evo hoćemo da ih lako otjeramo. Mislim da je to stvarno za osudu i to njihovo ponašanje jer su bile drske, čak je rekao jedan Italijan da su režale na njega. I ja sam zvao Tuzlu, odjeljenje za strance i dobio jednog čovjeka koji mi je rekao, pa Safete daj pokušaj molim te da ideš sa jednim ovakvim dopisom. Mislim da se može uraditi posao ali dobro bi bilo da i Općinsko vijeće uputi jedan dopis da ne bude nikakva fama i problem oko toga jer sam bio u Policijskoj stanici u Gračanici gdje mi je jedna žena rekla da ne mogu dobiti dozvolu uopšte za boravak. Ljudi ovdje dobiju dozvolu ali poslije nisam mogao uopšte da produžim, a to je sramota. Teško je njih dovesti ovdje da kažem, ali ih je vrlo lako otjerati. Pa evo mislim da nije loše da i Vijeće pošalje jedan takav dopis.

Isto tako želio bih da Općinsko vijeće uputi jedan dopis našoj kantonalnoj vladi, Vladi TK, na ruke premijera, na ruke ministra finansija i na ruke ministra za industriju, energetiku i rudarstvo a vezano je za plaćanje, odnosno refundaciju porodiljskog bolovanja. Ja sam prije par dana poslao jedan dopis i načelniku, na tri adrese i mi smo najavili protest u Tuzli. Međutim, odgovor policije je da još nemamo slobodnog placa pred Vladom u narednih deset dana, ali ćemo vjerovatno u narednih deset dana dobiti saglasnost da se i mi nađemo na placu Vlade i da protestiramo. O čemu se radi. U zadnjih godinu dana nama nije plaćena ni marka od te refundacije i dug je sa 31. 12. dostigao pola miliona i vjerujte da je naša kalkulacija tako tanka, tako knap, da se radi o milimikronima, u milicentima i zaista na ovakav način ja moram ovdje javno da kažem da naš kanton i naša vlada ubija gračaničku privredu, što je sramota. I zaista želim da ovo vijeće uputi jedan oštar dopis na ove tri adrese da se što je moguće u skorije vrijeme ovo izmiri. U protivnom, moram da kažem, uslijediti će malo žešći protesti.

Dalje, pita me grupa građana šta je sa kotlovnicom gračaničkom, o čemu se radi, imamo informaciju da se broj konzumenata iz dana u dan smanjuje. Ja ne znam jesu li te informacije tačne ili ne, ali uglavnom su ta pitanja. A lično mene interesira kao privrednika, jer zadnji puta kad sam s

njima trebao da sklapam ugovor, tražili su mi za priključenje 50.000,00 KM. A pošto je u fabrika otvorenog tipa, znači to bi po našim procjenama bilo svaki mjesec potrošnje 3.000,00 KM. Iz tih razloga mi nismo ni razmišljali da se priključimo na gradsko grijanje, a imam informacije da ima pojedinačnih slučajeva da se ljudi isključuju zbog visoke cijene, lošeg kvaliteta i zbog mnogih drugih stvari, pa evo pitanja. Šta je s gradskom toplanom, da li ona misli dalje da širi svoju mrežu, da poveća broj konzumenata kako bi se došlo do nekakve ekonomske cijene i kako bi što je moguće veći broj konzumenata došao na mrežu. To je pitanje za načelnika i Eko-toplane.

Drugo, grupa građana isto tako me zamolila da kažem na Vijeću da se pokuša ne isključivati gradsku rasvjetu nikako. Kažu da se u zadnje vrijeme događaju čudne stvari na rubnim dijelovima grada Gračanice, da se ulazi u dvorišta, hvata za šteke i pokušava ući nasilno, sigurno ne od strane dobrih ljudi, a možda sa ovim da bi se to dosta smanjilo kad bi se ta rasvjeta držala tokom cijele noći i uglavnom traže da se javna rasvjeta ne isključuje tokom cijele noći. Mislim da sam jasan.

Dalje, zamolio bih nadležne ovdje da pokušaju da stave jedno ogledalo u ulicu Patriotske lige na mjesto gdje se spaja Viteška ulica. To je izlaz iz bolnice kod apoteke gdje često dolazi do saobraćajnih nesreća. Zadnji put je bila prije pet dana, nije bilo povrijeđenih ali je bilo materijalne štete. Uglavnom se radi o nedozvoljenim parkiranjima i ne vidi se ni na jednu ni na drugu stranu, ama baš ništa, policija hoda po gradu evo i danas non-stop, ali ih nema gdje treba da budu. Čak i komandir policije naplaćuje kazne od građana ali ih nema gdje treba da budu. Ne treba komandir da naplaćuje kazne nije to njegovo. Ima on vojsku neka to radi vojska. Tamo je zaista katastrofa jer ja tamo stanujem i kad izlazimo ne vidi se ništa ni lijevo ni desno, jer je tu auto do auta. A ovamo se kažnjava čovjek koji stane na par minuta i dođe policajac i naplati kaznu 40,00 KM. Evo toliko, ako može da se tu postavi ogledalo. Toliko i hvala na strpljenju.”

Mirza Omerdić:

“Evo ja ću se pridružiti ovoj inicijativi od strane kolege Pjanić Safeta, pogotovo u pogledu ovih međunarodnih dozvola jer sam i ja imao dosta razgovora sa ljudima koji vrlo teško dobijaju te dozvole za međunarodni transport i to im pravi jako velike probleme. Takođe pridružiću se i ovoj konstataciji da Vlada TK malo guši našu privredu na različite načine. Jedan od načina je i ova refundacija bolovanja koja u većini firmi čini značajan trošak. Imam jedno ili dva vijećnička pitanja. Prvo pitanje se odnosi na konkurse koji su bili raspisani za upravne odbore. Imam informaciju da su poništeni, zbog čega? I za direktora “Komusa”, znači zbog čega su poništeni i da li bi to ugrozilo poslovanje ovih kompanija dodatno? Takođe posjedujem informaciju, a ovo je pitanje nadležnoj službi, da je ona privatizacija Vodovoda koja je oborena Rješenjem Agencije za privatizaciju, dakle sudskim putem je vraćana, da ponovo Općina gubi 49%. Da li imate tu informaciju, jer ovo je neka informacija za koju ne znam koliko je tačna.”

Rahim Gadžić:

“Ja imam jedno vijećničko pitanje koje upućujem direktoru Elektrodistribucije Tuzla, a ono glasi: - Zbog čega dolazi do čestih isključenja napona na područjima sljedećih mjesnih zajednica: Prijeko Brdo, Trnovci, Džakule, Donji Doborovci, jedan dio Gornjih Doborovaca i Vranovića? Dao bih jedno obrazloženje. Svake padavine, da li bio snijeg ili kiša dolazi do isključenja napona električne energije na tim područjima. Evo zadnji puta kada su bile male količine snijega, prve pale, te mjesne zajednice su dvanaest sati bile bez napona električne energije. To se ponavlja evo već sigurno dvije, tri godine konstantno. Taj dalekovod koji ide preko Lohinje i Vranovića i napaja taj dio područja mjesnih zajednica, dolazi do kvarova na tom dalekovodu. Mi smo pokušavali u nekoliko navrata da se pomogne i ja sam se više puta obraćao našoj Elektrodistribuciji i direktoru Seadu, da se uključe MZ-e i da se razriješi ta dilema. Međutim, to nije dalo nikakvih rezultata. Na tom području su četiri brente koje rade, ima pogon Fortune koji radi, omaju farme pilića, ima niz privrednih subjekata koji rade, a konstantno dolazi do tih isključenja napona. Evo mi i danas, sve mjesne zajednice stavljamo se na raspolaganje ako Elektrodistribucija Tuzla nema para da to uradi mi ćemo jedan dio sredstava dati jer ovo više nije za izdržati. Mi pogledamo jedan dio Gornjih Doborovaca koji se od Sokola napaja električnom energijom sruje ne nestaje, znači ima. Pogledamo MZ-u Buk, isto ima, napaja se sa Gradačca. Samo taj dalekovod konstantno je sa takvim dešavanjima i ljudi ne znaju šta više da rade. Ako Elektrodistribucija Tuzla neće nikakve korake

preduzeti da se to razriješi, vjerovatno će mještani prestati plaćati električnu energiju jer nema smisla da u današnje doba, evo kao sad zadnji put nemamo po 12 sati električnu energiju. I to samo ove MZ-e, a sve ostale imaju. I zato tražim da se ovo pitanje proslijedi direktoru Elektrodistribucije Tuzla i da se maksimalno svi uključe koji mogu da pomognu da to razriješimo.”

Edin Ibrišević, predsjedavajući Vijeća je kandidovao sljedeće:

“I ja imam jednu inicijativu koju upućujem Općinskom vijeću Gračanica. Tražim od Općinskog vijeća Gračanica da uputi inicijativu prema Fondu za zaštitu okoliša Federacije BiH i Institutu za hidrotehniku Građevinskog fakulteta u Sarajevu kao nositelju realizacije projekta “Razvoj sistema podrške odlučivanja za smanjenje rizika od okolišnog zagađenja rijeke Bosne” koji je u sklopu programa NATO-a – Nauka za mir i sugurnost, da u rijeci Spreči postavi mjerni instrument, automatski uzorkivač “ISCO” (kojeg posjeduju), na mjestu u kojem rijeka Spreča se uliva na područje općine Gračanica. Razlog podnošenja ove inicijative je konstantno zagađenje rijeke Spreče, Sprečkog polja i životne sredine na području općine Gračanica od strane zagađivača sa drugih općina našeg kantona.”

Nije bilo više prijavljenih članova Vijeća za postavljanje pitanja i inicijativa pa se prešlo na raspravu o predloženom dnevnom redu 16. sjednice Općinskog vijeća Gračanica.

Nije bilo učesnika u diskusiji o predloženom dnevnom redu te je isti usvojen jednoglasno a glasi:

1. ODLUKA O OBJAVLJIVANJU JAVNOG OGLASA ZA IMENOVANJE ČLANOVA
OPĆINSKE IZBORNE KOMISIJE GRAČANICA
Izvjestilac: Zehra Mujačić, sekretar Vijeća
2. IZVJEŠTAJ O RJEŠAVANJU UPRAVNIH PREDMETA U SLUŽBAMA
ZA UPRAVU OPĆINE GRAČANICA U 2013. GODINI
Izvjestilac: Senaida Šaković, šef Službe
3. INFORMACIJA O STANJU SIGURNOSTI NA PODRUČJU OPĆINE GRAČANICA
U 2013. GODINI
Izvjestilac: Omer Halilčević, načelnik Policijske uprave Gračanica
4. INFORMACIJA O UTICAJU ZAKONA O PROMJENI NAMJENE POLJOPRIVREDNOG
ZEMLJIŠTA NA POSTUPAK IZDAVANJA ODOBRENJA ZA GRAĐENJE OBJEKATA
SA INICIJATIVOM ZA IZMJENE I DOPUNE ZAKONA
Izvjestilac: Aida Hodžić, šef Službe
5. RJEŠENJA I ZAKLJUČCI IMOVINSKO-PRAVNE SLUŽBE
Izvjestilac: Aida Hodžić, šef Službe

Odmah se prešlo na rad po dnevnom redu.

TAČKA 1:

ODLUKA O OBJAVLJIVANJU JAVNOG OGLASA ZA IMENOVANJE ČLANOVA
OPĆINSKE IZBORNE KOMISIJE GRAČANICA

Učesnik u diskusiji je Hasan Fehrtović koji je prvo iznio stav Komisije za propise i Statut, izbor i imenovanje, općinska priznanja i obilježavanje značajnih događaja i ličnosti, kao i svoju ličnu diskusiju.

Hasan Fehratović:

„Nadležna komisija je razmatrala prijedlog ove odluke i ja ću ovdje pročitati jedan zaključak koji glasi da se ubuduće kod imenovanja komisija koje imenuje Općinsko vijeće prilikom

predlaganja sastava da veća uloga stalnim radnim tijelima Općinskog vijeća i da se prilikom prijedloga sastava komisija za ove intervjuje i vođenje procedure vodi računa o struci predloženih u komisiji u odnosu na one koje Vijeće treba imenovati i da se u komisijama ne ponavljaju iste osobe. Dakle, iznosim stav Komsije, ovo nije moje mišljenje. Iskoristit ću izlazak za ovu govornicu da i kao vijećnik kažem par riječi vezano za ovo. To je dakle moj lični stav. S obzirom da Općinsko vijeće direktno imenuje članove Općinske izborne komisije, naravno uz saglasnost Centralne izborne komisije, a komisija koju danas trebamo imenovati nema niti jednog člana Općinskog vijeća niti nekog drugog radnog tijela, ja smatram, a ovo je specifična odluka nije to kao što smo imali komisiju za imenovanje članova upravnih odbora gdje načelnik predlaže, a Općinsko vijeće imenuje. Dakle, ovo je direktna nadležnost Općinskog vijeće. Otvaram evo ovdje jednu raspravu i iznosim svoje mišljenje da razmislimo da ovu komisiju proširimo sa članovima Općinskog vijeća, a ovo je i direktni interes Općinskog vijeća i direktno imenuju ovu komisiju. Naravno rukovodim se sljedećim činjenicama, a juče sam konsultovao i sekretara Općinskog vijeća da nema nikakvih ograničenja koje može biti ili ne može biti član ove komisije za provođenje procedure, da to nije kao kod komisije koja se imenuje kod imenovanja državnih službenika itd. Dakle, da malo razmislimo da li je potrebno, ima li smisla i potreba da ovu komisiju za provođenje procedure proširimo sa članovima Općinskog vijeća.“

Za riječ se javio Rahim Gadžić, predsjednik Kluba vijećnika SDA:

„Kad je u pitanju ova odluka Klub vijećnika SDA prije izjašnjavanja o istoj traži pauzu, i tražimo od tebe predsjedavajući da zakažeš kolegij s kratkim sastankom kako bismo usaglasili stavove u vezi ove odluke.“

Predsjedavajući Vijeća je dao pauzu.

Nakon pauze, a uz prisustvo 28 članova Općinskog vijeća sjednica je nastavljena.

Rahim Gadžić je kao predsjednik Kluba vijećnika SDA iznio sljedeći stav:

„Klub vijećnika SDA je imao iskrene namjere da usaglasimo ovu odluku i pokušali smo da ovu komisiju proširimo sa nova dva člana, međutim Kolegij Općinskog vijeća se protivi kategorički za proširenje. Samim tim što ne dozvoljavaju da se proširi ova komisija, a mi i dalje ostajemo pri stavu da je treba proširiti, nemamo ništa protiv ova tri člana, ali smo tražili još nova dva člana i nismo se uspjeli usaglasiti i Klub vijećnika SDA ovu odluku neće podržati. Mi ćemo glasati protiv.“

Nije bilo više učesnika u diskusiji i Odluka o objavljivanju javnog oglasa za imenovanje članova Općinske izborne komisije Gračanica je usvojena sa 16 glasova „ZA“ i 12 „PROTIV“.

TAČKA 2:

IZVJEŠTAJ O RJEŠAVANJU UPRAVNIH PREDMETA U SLUŽBAMA ZA UPRAVU OPĆINE GRAČANICA U 2013. GODINI

Učesnici u diskusiji po ovoj tački dnevnog reda su.

Hasan Puškar:

„Imam jedno pitanje. Uvjerenja koja se izdaju za potrebe radnika na privremenom radu u inostranstvu, ovdje u Izvještaju se navodi da se ne vode evidencije, znači evidencije o tim uvjerenjima. Ako se ne vode evidencije ja znam da se ta uvjerenja plaćaju oko 150,00 KM gore po mjesnim uredina itd. Pa ako se ne vode evidencije o uvjerenjima, onda gdje ide novac? Ima li evidencija o novcu? Tako piše, a ja znam iz ličnog primjera, svaki put u mene otac, evo neki dan je platio 150,00 KM vadeći tako neke papire u mjesnom uredu i znam da su to masne sume, sto posto, ja to ovdje tvrdim. Na razumijem, ovdje se ne vodi evidencija tih uvjerenja, a naplaćuju se. Kako ćemo znati šta je onda naplaćeno? Na osnovu čega?“

Odgovor je dao Općinski načelnik Nusret Helić:

„Samo malo da pojasnimo. Dakle, možda se nije razumjelo. Izdaju se uvjerenja na osnovu činjenica o kojima se vode evidencije i na osnovu činjenica o kojima se ne vode evidencije. O ovim

zaposlenim se ne vode evidencije, u posebnom se postupku utvrđuje. I to je to što piše. Dakle, nemamo mi evidencije da je on zaposlen u inostranstvu. Na osnovu drugih dokaza utvrđujemo činjenice i damo im te potvrde. I pare što se uplate zna se idu u budžet, ali imaju dvije vrste uvjerenja, imamo ono što vode matične knjige, gdje se kad neko kaže hoće rodni list i izdaješ na osnovu matične evidencije. Hoću sad potvrdu npr. da imam kuću negdje tamo, nije evidentirano i onda se u postpku utvrđuje. To je to, ništa drugo.“

Edin Ibrišević:

„I ja sam htio da uzmem učešće s obzirom da nam ovaj izvještaj ustvari govori, odnosno u prvom redu se odnosi na usluge građanima i trebali bi malo više da obratimo pozornost na ove određene rečenice, kao npr. evo stoji najveći broj neriješenih predmeta je u oblasti građenja. Upravo se nadovezujem na ovu posljednju tačku dnevnog reda, oko ovih dozvola i mislim da bi Vijeće po ovom trebalo da zauzme stav, a u zaključnim razmatranjima i sam šef Službe navodi da bez obzira na broj opravdanih razloga, o prekoračenju rokova u rješavanju predmeta nismo zadovoljni ni sa stanjem rješavanja upravnih predmeta. Dakle, ova usluga se odnosi direktno na građane. Mislim da ovdje u zaključnom razmatranju što je navela šefica, da li treba uposliti nove ljude, da li neki novi moritoring. Uglavnom, treba odavde dati određenu inicijativu i da se smanji ovaj rok čekanja na ove određene dokumente, na koje se može smanjiti. Na ove druge se ne može smanjiti, kao što je gradnja i slično, to nije do nas, ali može se uputiti inicijativa većim instancama koje odlučuju o tome.“

Hasan Puškar:

„Imam i ovo, slobodan pristup informacijama. Ovo je za mene nezamislivo da na 75% informacija nije odgovoreno. Tako piše, ili je odbijeno, šta ja znam. Sada neka neko objasni ovaj procenat na ukupan broj neriješenih predmeta, znači nije riješeno. Po Zakonu o pristupu informacijama nema odbijene informacije. Na sve se mora odgovoriti. Ja koliko znam tu smo potanki sto posto. Druga stvar, mi radi nekog poštovanja prema službenicima i službama nećemo ovdje da iznosimo svoja mišljenja. Znači samo iz poštovanja, ali meni je nezamislivo, a svi to znamo, garantujem da u zakonskom roku po ZUP-u, gro predmeta nije riješen u zakonskom roku. Ove tabele kad bi uzeli sada provjeravati zakonski rok 30, odnosno 60 dana, predmeta nije riješeno da ne govorim procenat i kad bi tabele pošli pregledati, ali o tom po tom, doći će nekad i to na red. Ali evo oko Zakona o pristupu informacijama, koliko ja znam to će sada biti i kažnjivo. Slobodan pristup informacijama znači od 66 zahtjeva, šta je ovo što stoji da 75% nije riješeno, samo tu piše. Ako može da mi neko objasni, možda je i neki nesporazum. Tabelu ja imam ovdje.“

Odgovore na pitanja i sugestije dala je Senaida Šaković, šef Službe za upravu, društvene djelatnosti, boračko-invalidsku zaštitu i zajedničke poslove.

Nakon toga Izvještaj o rješavanju upravnih predmeta u službama za upravu Općine Gračanica u 2013. godini je usvojen jednoglasno sa 28 glasova „ZA“.

TAČKA 3:

INFORMACIJA O STANJU SIGURNOSTI NA PODRUČJU OPĆINE GRAČANICA U 2013. GODINI

Uvodno obrazloženje na Informaciju dao je komandir Policijske stanice Gračanica Safet Ibrahimović.

U diskusiji su učestvovali:

Vehid Osmanović:

„Klub vijećnika SDP-a će podržati Informaciju o stanju sigurnosti na području općine Gračanica za 2013. godinu.

Statistički podaci obrađeni ovom informacijom uglavnom ulijevaju optimizam da se stanje popravlja u odnosu na 2012. godinu, osim nažalost u segmentu povećanog broja smrtnih slučajeva usljed saobraćajnih nezgoda.

Za mene lično ali i dio mojih kolega, ocjena stanja sigurnosti kao zadovoljavajuća možda nije adekvatan termin jer mi ne možemo i ne smijemo biti zadovoljni dok nam kriminalci šetaju ulicama, divljaju cestama, provaljuju u stambene objekte, vikendice, privredne zgrade, krađu stoku, auta, opremu, alat i slično. Slažem se da se to u potpunosti neće iskorijeniti ali se još više može smanjiti preventivnim djelovanjem što je djelimično objašnjeno i u dijelu u kojem se govori o mjerama za unapređenje stanja sigurnosti.

Sada bi u sklopu ove diskusije iznio svoje lično i stajalište velike većine građana Gornje Orahovice, čak su me neki i zamolili da to iznesem. Možda smo mi baksuzni ili na lošem položaju pa spadamo u red onih MZ-a pogodnih za krađe i teške krađe. Po ovom izvještaju smo na visokom trećem mjestu u prošloj godini sa 14 krađa. Nažalost broj otkrivenih počinitelja u Gornjoj Orahovici je neznatan. Navest ću samo dva primjera za protekli period, ne mislim samo u prošloj godini. Ja lično sam imao 5 (pet) prijava nasrtaja na ličnu i imovinu firme. Nijedan koliko znam nije riješen. Moj kolega privrednik Mehinbašić Sead takođe je uz krađu auta imao i 3 provalne krađe (kuća, trgovina, firma) koja takođe ni jedna nije riješena. Niz je i drugih provalnih krađa u kućama, krađe stoke, automobila, opreme te u nekoliko navrata i ormara javne rasvjete i slično. Jedan manji dio toga je rasvijetljen. Zato vas ovim putem molim da u svojim planovima posvetite više pažnje zaštiti lične imovine građana Gornje Orahovice kao naravno i drugih naselja. Ako treba možemo vam u skoroj budućnosti obezbijediti i nužne prostorije kako bi se ova nesigurnost građana Gornje Orahovice popravila. Na mene kao predsjednika VMZ-e Gornja Orahovica građani vrše pritisak da se to stanje promijeni jer je to u drugoj polovici godine gore bilo katastrofalno.“

Sjednicu je napustila Ahmetašević Jasenka. Prisutno je 27 vijećnika.

Fadil Mešić:

„Ja iako sam se prvi javio u Poslovniku ne kaže da predsjednici klubova imaju prioritet. Imao bih za komandira dva pitanja. Da li komandir Policijske stanice ima rješenje za adaptaciju vanjskog i unutrašnjeg dijela zgrade? Zaista je prilaz stanici skoro pa opasan po građane koji odlaze u stanicu. U pitanju su komandire stepenice koje su neravne, skoro da gazište tih stepenica i ne postoji. Imate sreću što niko do sada nije stradao, a bili bi odgovorni naravno. Ako nemate sredstava, možemo mi po 100,00 KM i da riješite i stepenice i da riješite tamo ona vrata jer se ne mogu ni otvarati, a skoro se ne može ni ući. Nedopustiv je taj prilaz. Drugo pitanje, prolazeći pa sam uočio, zašto vozila oduzeta po raznoraznim osnovama stoje dugo pred MUP-om i zauzimaju prostor, a vaši uposlenici koriste prostor preko puta i time opet oduzimaju pravo građanima? Da li imate rješenje i da li su se ustvari stekli uslovi da se ta vozila prodaju, dvadeset vozila po 500,00 KM je 10.000,00 KM. Eto i to recimo ukoliko bi ta vozila sklonili ispred zgrade, time bi se stovrili uslovi za oslobađanje parkinga vašim uposlenicima. To su otprilike ta dva pitanja pa molit ću odgovor.“

Zajim Nurić:

„Moje pitanje se odnosi na Izvještaj, odnosno Informaciju o stanju sigurnosti na području općine Gračanica za period 2012. godine u kome je konstatovano da je u 3 slučaja došlo do narušavanja javnog reda i mira na „javnim skupovima“ predizborne radnje te na dan izbora. Obzirom da u tabeli JRM- za 2013. godinu-kolona 2012. godina stoji prekršaji po zakonu o javnom okupljanju 0-ništa. Pitanje glasi: Šta je poduzeto po gore navedenim prekršajima iz kraja 2012. godine-narušavanje JRM na javnim skupovima?

- Zapažanje - odnosi se na odvijanje saobraćaja na raskrsnici kod Žitokombinata kako pješačkog tako i motornih vozila. Smatram da bi bilo neophodno da u određenim situacijama na navedenoj lokaciji stalno budu radnici Policijske stanice kako bi se saobraćaj odvijao efikasno i na bezbjedan način, obzirom da velika frekventnost pješaka i vozila u jutarnjim staima-učenicima, te u vrijeme odlaska i vaćanja sa posla.“

Fadil Mešić:

„Tražim da predsjedavajući moju inicijativu, to jest prijedlog da se po 100,00 KM od vijećničkog paušala od sljedeće isplate odvoji. Komandire, nadam se da nemate ništa protiv, jer niste imali sredstava da riješite. Neće to nama biti puno.“

Ibrahim Hasić:

„Ja bih malo kad su u pitanju otkrivanja krađa. Tu bih nešto promijenio jer ide posve kilavo i sporo. A zašto to kažem kilavo i sporo. S obzirom da su svi ti, tako da ih nazovsemo lopovi, što veći što manji, svi su oni povratnici. Nije niko novi. I ukradene stvari oni vuku na jedno skladište. Ne vuku na tri skladišta i da to ne može krim služba policije otkriti, meni je to neshvatljivo. U 2012. godini naravno bila je predizborna godina i neko je počeo mene vozati po fejbuku pod okriljem mog profila. I kao ja sam sebe blatim itd. itd. i ja sam potrbuške dvije noći spavao i razmišljao, ovaj je, mogao bi biti ovaj. Da bi, vjerujte da sam ja ofirao osobu i da mi je osoba priznala i da je kazao da nikad više neće. Ja ne mogu, ponavljam, ne mogu shvatiti da krim policija ne može otkriti lopova, a svi su povratnici. Slažem se novog lopova ne može otkriti. Recimo ja sam imao neku sitniju krađu, odnosno kod mjene je to bilo prošle godine i ja sam lopova kazao po imenu i prezimenu i do dan danas nemam informacije nikakve. Ponavljam imenom i prezimenom kazao lopova koji se hiljadu puta povratio i hiljade djela počinio. Kad je u pitanju nasilje u porodici igrom slučaja ja imam u komšiluku, nema pedeset metara od moje kuće i tu je oženjen komšinicom mojom. Slovenski je radnik u penziji je. Ona njemu neda priviriti ni u staru kuću, a ne novu koju je napravio. Malo jeste smiješno ali je žalosno kad čovjek dođe pa se, da ne kažem, potuca od komšiluka do komšiluka i pita šta da radi. I na kraju kad mu dozvoli da spava u staroj kući bez sruje, na zemlji bez išta, da se tako izrazim „kao divlji krmak“ ono u šumi kad legne dolje na pod. Mislim da i tu treba malo više povesti računa.“

Hasan Puškar:

„Klub vijećnika SDA će podržati Informaciju, a ja ću sada iznijeti prvo jednu usporedbu, primjedbu, a onda ću postaviti dva pitanja. Znači, krivično djelo protiv opojnih droga, proizvodnje i stavljanje u promet. Baš mi je drago što 2012. godine imali smo 15 djela, a 2013. godine u minusu 40%, što znači da sljedeće godine nećemo imati uopšte da neko rastura narkotike i stavlja u promet i proizvodi. A sad ću staviti jednu usporedbu. Ja kad sam napustio policiju, vodio sam odjeljenje za borbu protiv narkomanije i te godine smo imali vjerovali ili ne, što krivičnih i prekršajnih prijava oko 150. Baš mi je drago, za ovo godina što smo napredovali. Ali čisto sumnjam da je tako. Ali to je stvar krim policije jer je to njihov osnovni posao, a uniformisana policija radi druge poslove i stvari. Sad ću postaviti komandiru dva pitanja. Znam ja da se promijenio zakon, ali imaju izvršioc, ostali su isti. Nema to veze za krivičnim i prekršajnim prijavama, znam šta će biti odgovor. Pitanja su, šta utiče na sigurnost saobraćaja? To je prvo pitanje, a drugo pitanje je, ko je nadležan za održavanje puteva, osim regionalnih i magistralnih puteva? Znači koja je služba ili ko je odgovoran za održavanje. Pod održavanjem podrazumijevam signalizaciju, postavljanje horizontalne i vertikalne, udrnih rupa na putu i dalje. Kad dobijem odgovore onda ću konstatovati nešto.“

Safet Pjanić:

„Klub vijećnika BPS-a će podržati Informaciju koju nam je prezentirao komandir, mada smo više voljeli da je ovdje i načelnik Policijske uprave jer dosta pitanja treba uputiti njemu. Ja ću reći dvije stvari. Podržat ćemo iz razloga što je evo vidljivo da je smanjen broj djela i da on ima dalje tendenciju pada, smanjenja i moramo reći i to da ljudi rade zaista u teškim i vrlo teškim uslovima. Pridružiti ću se kolegi vijećniku Mešiću kad je u pitanju objekat. Moja primjedba je na ulaz u Policijsku stanicu. I ja ću zaista evo kao čovjek, privrednik potruditi se da sa vama nađemo rješenje da to brzo uradimo. Nećemo tražiti pare od vijećnika. To su male pare i to moramo riješiti jer je zaista ružno meni kao građaninu, evo i kao vijećniku da vam je ulaz da kažem katastrifalan. Reći ću dvije stvari. Prva stvar, moramo reći da je na općini Gračanica tzv. roditeljska sigurnost nesigurna. Ja sam čovjek koji se ovdje rodio i živim u čaršiji i znam, a znate možda i vi komandire ima dosta njih još koji rade i dilaju drogu, proizvode i dilaju drogu. I nisam kao roditelj siguran da sutra neće to zadesiti i moje dijete. Mislim da su stvari vrlo ozbiljne i otprilike svi znamo ko to radi, a znate i vi vjerovatno, ali nećete da kažete. Evo mi ćemo putem telefona anonimno vama dojaviti ko je to, ali sad znam iz prve ruke njih sigurno pet, šest. To je stvar na koju se mora zaista brzo reagovati i takve privesti pravdi, ali ne da se kaže kao kolega Hasić, on je povratnik, takvi su svi, a dajte da bude nepovratnih i kada ga uhapsite da se ne vraća više. Druga stvar je ovo divljanje automobilima. Opet ću vam reći da vi znate ko to radi. Svaki dan je vaša patrola dole na Lukama,

otprilike oko 8-9 sati i tu bude sat ili sat i po, a to koji to rade idu ovom ulicom pored bolnice, ul. Patriotske lige, idu 120 na sat. Juče je prošlo auto kraj mene 150 na sat. Znete vi koje i kakvo je auto, upadljive je boje i on može napraviti ovdje pačariz. Neka se potrola samo premjesti i nađe mjesto pored škole, mogu ga odmah uhvatiti i taj neće više divljati. To je velika brzina. Mi ćemo podržati ovaj izvještaj apsolutno, želimo da pomognemo vama u vašem radu kao građani, ali evo i vi učinite sa svoje strane koliko možete. Dobro je, ali znate da se kaže, može još bolje. Nemojte vi gledati na Lukavac, na Živinice, vi gledajte na našu općinu i ovdje da djela smanjujete, a oni neka rade šta hoće, a neka u Gračanici bude dosta normalnija situacija.“

Dino Dedić:

„Klub vijećnika LDS i NS je razmatrao ovu informaciju i prihvatit ćemo Informaciju u potpunosti, znajući u kakvim uslovima radite. Veoma je pohvalo da se smanjio broj krivičnih djela što nam je ovdje i prikazano.“

Edin Ibrišević:

„Evo u ime Kluba SDU i SBB da kažem da smo i mi razmatrali ovu informaciju. Mislimo da i ovom smanjenju možda je doprinijelo i ponovno formiranje Policijske uprave Gračanica i smatramo da je to dobro. Takođe, drago mi je što u Informaciji po prvi puta vidimo da se vodi prosijačenje, odnosno da se poduzimaju mjere na rješavanju ovog problema pa se iskreno nadamo da ćemo u narednom periodu i to prosijačenje dovesti u najmanju moguću mjeru. U suštini znači podržat ćemo ovu informaciju.“

Nihad Krajinović:

„Ja prije svega želim da pohvalim rad policije kada je u pitanju inicijativa koja je otišla iz ove sale nedavno, da se postavi patrola u park ispred srednje škole što je rezultiralo grupi na koju se sumnjalo da rastura narkotička sredstva. Više ih tamo ja nisam vidio, provg polugodišta ove školske godine. Kada je u pitanju rasturanje narkotičkih sredstava i u izvještaju 2012. godine se kaže da je bilo 4,27 grama kanabisa i nešto heroina. Nakon što smo prihvatili informaciju koja je bila takođe u januaru 2013. godine, desila se velika akcija Federalnog MUP-a, ako se ne varam, u kojoj je otkrivena jedna grupa ali nemam podatak koliko je i da li je pronađeno narkotičkih sredstava. U 2013. godini je pronađeno 11 grama kanabisa i policija bi trebala malo više raditi ili ko je već zadužen za ovu vrstu kriminaliteta da nam se ne pojavi akcija u kojoj će biti pronađena veća količina iznenada, a znamo da toga ima i da se takve osobe ponašaju vrlo neodgovorno, vrlo bahato i vrlo hrabro na ulicama našeg grada. I kad je u pitanju ova informacija, odnosno izvještaj, kod zaključaka da je smanjen broj prijavljenih krivičnih djela za 200 ili 25%, što znači da je krivičnih djela moglo biti i više, ali jednostavno građani u odnosu na ovo što su kolege govorili, više ne znaju da li da prijavljuju jer se puno tih krivičnih djela ne rješava ili do njih ne stiže povratna informacija pa jednostavno ljudi više i ne prijavljuju neke sitne krađe ili neka prestupništva.“

Odgovore na pitanja i sugestije dao je Safet Ibrahimović, komandir Policijske stanice Gračanica:

„Obično se ne postavlja ovoliko pitanja, pogotovo Policijskoj stanici, ali evo dolazi pismeno, dolazi od građana pojedinačno sa svojim problemima. Mi svake srijede imamo otvorena vrata, znači kod komandira po bilo kom pitanju. Dakle, svi oni koji žele, bez najave mogu doći srijedom od 11.00 do 13.00 sati. A što se tiče konkretno za pojedine predmete, a neko je ovdje rekao da nije imao povratnu informaciju, mi povratno ne vraćamo te informacije, nego ako neko zahtijeva mi je damo na uvid, a ako želi napismeno onda ide preko pisarnice za šta ima propisana procedura. Što se tiče ovih pitanja, evo Vehid Osmanović je spomenuo Gornju Orahovicu, koja ne odudara puno od nekih mjesnih zajednica, Donje Orahovice, Miričine pa i Stjepan Polja. Bila mi je prije nekoliko dana dostavljena jedna vijećnička inicijativa, mislim da je iz Stjepan Polja, na kojoj se kaže nema dovoljno prisutnih patrola na terenu. Ja vama ovdje mogu reći da mi u Policijskoj stanici, a vidjeli ste u ovom uvodnom dijelu Informacije, imamo 99 ljudi sa današnjim danom na raspolaganju, plus OKP, kriminalistička policija gdje imamo 15 ljudi, a pokriva općine Doboj Istok i Gračanicu. Od tih 99 ljudi računajući kompletan sastav Policijske stanice i onih koji rade u administrativnim

dijelovima posla i dežurstva, znači smjena 24 sata. Ja u toku jedne smjene mogu imati maksimalno četiri patrole. Dvije saobraćajne, jedna je u centru grada i jedna koja je interventna u slučaju potrebe. Sektorski rad je predviđen tako je svugdje, rade u dnevnim satima po MZ-a gdje imamo 8 sektora. Tu su dva službenika policije koji rade na tom terenu i razgovaraju sa građanima i donose informacije prema nama, a mi preduzimamo određene mjere. Dakle, nemamo dovoljno prostora za pokrivanje MZ-a u kapacitetu kako to neko misli da može. To je jedna stvar. Druga stvar i ovo što imamo moglo bi biti dovoljno kada bi mi bili mobilni. To je kada bi imali na raspolaganju više vozila i više goriva. Mi smo bili u situaciji da imamo vozila a namamo goriva, pa imamo goriva a nema vozila. Evo sada nemamo ni jedno ni drugo. Ja i sada čekam informaciju u vezi s tim. Ako ste primijetili moje patrole od petka su fiksirane po tačkama. Znači jedna je ispred Općine, jedna je kod benzinske SSKO TRADE, od petka 24 sata. Zašto? Zato što nemam goriva, jer sam na rezervi. Nisam natočio gorivo od petka. Danas čekam informaciju kad će biti uplaćeno. To su problemi koji nisu samo danas bili, mi to imamo od ranije. Da bi mi pokrili područje, da bi mi bili u MZ-i Orahovica Gornja svaki dan ili svaki peti dan po bilo kom osnovu, iziskuje ovo materijalna sredstva. Ja nemam u informaciji koliko je u kojoj MZ-i se dešavalo, a on to s pravom govori, nemam informaciju koliko je tačno u kojoj MZ-i krivičnih djela otkriveno jer to nije nikad bio predmet, jer su sva krivična djela na području općine i kad se otkrije to je u tom broju. Mogu reći u posljednjoj akciji u kojoj je učestvovao TK i ZDK, gdje je uhvaćena kriminalna grupa koja je već pet mjeseci praćena, intenzivno na različite načine i preko 220 djela samo na prostoru TK, od toga 33 na našem području i pretpostavljam da ih ima i iz Orahovice Gornje itd. Oni ukradu vozilo na jednom području, a to su radili i kod nas kod Fortune na kiosku, pa u Nasmera Karića objekat i niz drugih objekata na području općine. Znači 33 je rasvijetljeno i u istom su učestvovali naši krim službenici. Isto tako poslije nove godine smo imali 20 djela obijanja auta od kojih su otuđivani akumulatori pa evo odgovora na pitanje oko te prodaje na određenim mjestima. Mi znamo gdje se oni otkupljuju i mi to obilazimo, ali mi nismo u mogućnosti pokriti 24 sata. Za njihov rad nadležna je inspekcija da li oni evidentiraju svaki predmet koji kupe. A oni to ne rade. Mi imamo i sad primjer šest akumulatora od obijenih 20 auta, izvršioци su pronađeni, otkrivena su ta djela u nekoliko MZ-a. Mi smo tih šest akumulatora oduzeli iz Kantić-Proma i sad je nadležnost inspekcije da podnese prijavu. Ali neće, jer oni nisu to zatekli, iako mi imamo dokaz i mi smo oduzeli i predali te predmete. Mi protiv nje ne možemo podnijeti prijavu jer je dobrovoljno predala te predmete. Tu su procedure jasne kad je to u pitanju. Sada ću malo preskočiti pitanje Fadila Mešića, Ibrahima Hasića koji je postavio pitanje na povratnike itd. tamo imate u tabelama koliko je povratnika, stoji izvršioци pa onda tamo koliko ih je povratnici. Mi toga imamo stalno, mi kad otkrijemo izvršioца evo iza ovih 20, nakon 12 ili 24 sata koliko ih mi možemo držati mi ih puštamo na slobodu. Dakle, oni mogu nastaviti opet, pa ih mi opet nađemo i držimo u pritvoru i tako dalje. Takvih krivičnih djela je najveći broj. Kada će Tužilaštvo, odnosno sudija za prethodni postupak lice stviti u pritvor. Kada je počinjeno krivično djelo za koje je predviđena kazna preko 5 godina. A takvih je najmanje. Tada on ide u pritvor mjesec dana pa još mjesec itd. i onda se vrši suđenje. Dakle, mi smo isto tako suočeni sa ovim povratnicima i imamo problem, mi znamo imamo spiskove, kojim vozilima se kreću itd. Ali na otkrivanju jednog krivičnog djela morate imati i materijalni dokaz, nije dovoljno reći samo, jest on je sigurno 100%. Kad je u pitanju nasilje u porodici, znam taj slučaj. Taj čovjek je prije na godinu prijavljen za nasilje u porodici prema toj ženi, a onda on kad je bio u poziciji obrnutog nasilja, čini mi se on zna da ne smije nasilno se ponašati prema njoj i on je nas pozvao i mi smo otišli jednom pa i drugi put, nije mu dala u kuću pa mu nije dala struje itd. i protiv nje ide prijava, ali stvar je tu sad suda da to razriješi. U posebno drastičnim slučajevima, ako je nasilje vidljivo prema bilo kome, ide se preko suda za prekršaje, zabrana pristupa, kao što smo imali ovdje. Nemamo u informaciji, koliko je tih slučajeva u prošloj godini, znači zabrana pristupa na određeni broj metara. Toga smo imali pet, šest slučajeva ili liječenje od alkohola, ili liječenje od droga i onda mi, i Dom zdravlja je nadležan za praćenje izvršenja te mjere koju je sud izrekao takvim licima. Kad je u pitanju rješenje adaptacije vanjske i unutrašnje zgrade policije, načelnik Općine je posebno tu upoznat, jer smo neke stvari zajednički radili, pokušali još 2006. godine ili 2007. godine pa smo napravili i idejno rješenje. Bilo je odobreno 270.000,00 KM, a onda je nastala restrikcija svih sredstava i nije se uradilo. Mi imamo problem gubitka velike količine energije, stolarija stara i slično, krov nije riješen adekvatno i to već deset godina propušta, a nadležnost je Vlade TK-a,

Ministarstva unutrašnjih poslova je da se adaptira zgrada jer je objekat većinski njihov, ali od tada nije uložena ni marka u objekat. Ono što je urađeno, uradila je Općina zajedno sa privrednicima i pojedinačno smo uradili salu za sastanke koja bila katastrofalna. Prošle godine smo opremljeni sa kompjuterima i vozilima. Sada nemamo vozila jer su ta dva uništena tako da u tom dijelu je to tako. Ulaz planiramo uraditi, ali to uslovljava rampu za invalide, što je problem zbog visine ulaza u stanicu. Zajim Nurić, u tri slučaja narušavanja javnog reda i mira kad su bili izbori, ja ne mogu ovdje odgovoriti. Znam za jedan slučaj, a možda i dva, podnešena je prekršajna prijava i jedan prekršajni nalog ali ako želite konkretno možete postaviti to pitanje, a ja ću naći te slučajeve i mogu odgovoriti šta je sa tim predmetima. Regulacija saobraćaja kod Žitokombinata. Evo ovdje sam malo prije naveo naše ljudske resurse kada je u pitanju i sam saobraćaj. Imamo dvije patrole, jedna praktično pokriva čitavu općinu i regionalni put, a ova druga je non-stop na magistralnom putu. I one tačno imaju određene tačke, vrijeme, mjesto kada moraju obavljati svoj posao. Mi imamo obaveze na raskrsnici BKC, na Lukama, zbog djece u jutarnjim satima da patrola bude prisutna, a istovremeno to imamo i u Orahovici i Lohinji kod osnovnih šila radi njihove bezbjednosti. Mi više ne raspolažemo sa ljudskim resursima za to što se tiče brzina koje se ostvaruju, mi imamo dva radara. Jedan je za prikriveno snimanje, ali sa prekoračenjem brzine od 10, 15, 20, 25, 30 km na sat nisu uvijek posljedice velike kao kod onih što su preko 30. Mi imamo evidenciju o tim prekršajima ali vrlo malo je tih preko 30 km na sat. Teško se boriti protiv ovih koji divljaju jer to oni rade tamo gdje nas nema. Hasan Puškar, 40% manje krivičnih djela kad je u pitanju otkrivanje narkotika. Ovdje ima razlike u ono vrijeme kada je on radio. Prvo to je bio jedan početak gdje smo mi praktično pravili hajku prema svima onima koji su to koristili. To je bilo dobro i bili smo najjači u Federaciji pa čak i šire, općinski posmatrano po policijskim stanicama, jer je to bilo regulisano Zakonom o prekršajima, a poslije je to sve prebačeno na Zakon o krivičnom postupku. Po Zakonu o krivičnom postupku i za najmanju količinu droge je postupak isti kao i za 10 paketa droge. Procedure su tu vrlo rigorozne i ako se ne sprovedu sve to pada. Dobar dio ovih krivičnih djela radi MUP pa i u sjedištu i u Federacnom MUP-u. Na sigurnost saobraćaja utiče, u prvom redu u najvećem procentu je brzina. Neprihvatljiva, neprilagođena brzina i dejstvo alkohola je na drugom stepenu. I tu su sada posljedice koliko je poginulih, koliko je teško povrijeđenih ili lako. Iako tamo stoji zadovoljavajuća, možda nije dobra, ali ja ne vidim na koji drugi način da je prezentiram jer takvu terminologiju koriste svi. To je odgovor ujedno i Safetu Pjaniću. Kad je u pitanju nadležnost za održavanje puteva. Ovdje je jasno za magistralne, regionalne, sad je došlo do te izmjene regulacije, a kad će to biti i saživit vidjet ćemo. Za lokalne, znači sve ostale kad je u pitanju signalizacija, horizontalna i vertikalna, nadležnost je općinskih službi, ako griješim neka me isprave, jer mi nismo nadležni. Mi postupamo po postavljenim saobraćajnim znakovima, po signalizaciji i ako je ona pogrešna mi možemo intervenisati ali ne možemo po njoj prijavljivati. Evo imamo primjer, ova zgrada što se radi mi imamo zank P, paralelno parkiranje, po navici svi parkiraju koso parkiranje jer godinama svi to pamtimo, koso se parkiralo i sada je postavljen samo jedan znak koji nije dovoljan za sve te učesnike i mi bi morali svaki dan pisati prikršaje za nepropisno parkiranje u toj ulici Kej, što to nije cilj nego prije toga moramo pripremiti horizontalnu signalizaciju pa kad se to postavi onda mi možemo primjenjivati mjere, što ne znači da mi stignemo sve. Mi nemamo kamera pa da iz baze reagujemo. I Ovo oko prijavljenih ili evidentiranih, znači ono što građanin prijavi, institucija ili mi otkrijemo, mi govorimo da su to evidentirani, a ono što neko nije prijavio mi i ne znamo iako smo znali otkriti krivično djelo, a oštećeni nije prijavio pa se to radi naknadno i jer bez njegove prijave nema djela. Ima pitanja i za vozila koja su oduzeta i nalaze se u krugu stanice. Mi imamo dugogodišnji problem sa tim vozilima. Premiještali smo ih tamo i ovamo i sve policijske stanice imaju taj problem. To su vozila koja potiču iz krivičnog djela, što znači da je predmet u istrazi i mi s njima ne možemo nigdje. Na nivou Kantona bi trebalo da postoji mjesto gdje bi se ta vozila odlagala, pa da neko to čuva. Mora biti ograđeno, ne smije imati niko pristupa kako se ne bi skidali dijelovi itd. Mislim da je to jedan ozbiljan problem koji treba Kanton da riješi, a mi to ne možemo.“

Hasan Puškar:

„Da malo konstatujem. Za gorivo i vozila, to je sramota Vlade, ministra, komesara i premijera i nezamislivo mi je sad kad znam za uništena dva vozila u saobraćajnoj nezgodi, nezamislivo mi je dalji rad policije. A ta vozila mislim čak da smo mi i kupili privrednici i Općina.

Nezamislivo mi je da se nastavi rad policija i tu smo samo ugroženi mi, građani općine Gračanica. Druga stvar, pitao sam šta utiče na sigurnost saobraćaja, osim alkohola i slično, pod broj jedan utiču u našem gradu onolike udarne rupe i nezamislivo je da se one više na urade. Zatim utiče saobraćajna signalizacija, horizontalna i vertikalna. Ne mogu shvatiti da se na Keju postavi znak paralelnog parkiranja, a da se vozila parkiraju pod kosim uglom i da niko ništa ne poduzima od strane službi. Znači mora se ocrtati parking ako je neko postavio. Druga stvar, nemoguće je proći kroz ulicu Kej sa teretnim vozilom. Uzimam samo Kej. Ja sam ovdje izlazio sa inicijativoma koja ne pije vode. Ne mogu shvatiti da ja deset puta izađem za govornicu i kažem da se dole kod otpada na Korića stavi rešetka, koje pet godina već nema, a mi autima udaramo na tu rupu. Ne mogu shvatiti da kod Grina godinu dana stoji udarna rupa koja ugrožava sigurnost saobraćaja i svi to vidimo i prolazimo, a nezamislivo mi je da to niko ne rješava. Zato vam kažem ko je nadležan. Imate vođu sektora, neka sjedne u vozilo i prođe po gradu i pošalje dopis u Općinu koja je nadležna za horizontalnu i vertikalnu signalizaciju i za odžavanje rupa. Neka neko prijavi, a ja sam neki dan bio kod komunalnog inspektora i ja ću sljedeći ponedjeljak ili utorak otići i kao građanin prijaviti, da vidim hoće li šta poduzeti. Išao sam ali nije radila. Prijavit ću jer se ja kao građanin vozam svaki dan po gradu i meni je ovo nezamislivo. Svake godine imaju sredstva u budžetu za održavanje, a ja koliko vidim ništa se na poduzima u vezi horizontalne i vertikalne signalizacije. Pitam sada, je li MUP napravio i jedan dopis ili prekršajnu prijavu protiv odgovornog lica u Općini i Općine Gračanica jer je ona odgovorna. Da nemamo skoro urađene mostove ne bi ni imali horizontalne signalizacije u gradu. Oko centra je groblje što se tiče saobraćaja. Ne može policija rješavati nešto što Općina ne radi svoj posao. Znači pod hitno se mora uraditi horizontalna i vertikalna signalizacija oko centra. Otkad su ulice rekonstruisane, a ništa nije urađeno. To je sramota. Moje pitanje se odnosi prema načelniku. Hoće li biti u 2014. godini riješena ona rupa dole i rešetka na Korića Hanu? Evo ja sam deset puta govorio za rešetku preko puta Variplasta, na dva metra. Ja svaki dan pedeset puta udarim na tu rupu. Drugo, za održavanje šahtova kad se ukradu, znam oni su ukradeni, ali je neko odgovoran da ih ponovo postavi i začepi rupu, da neko ne padne u šaht. To je stvar policije, i ići ću prijaviti u policiju. Neko će nešto poduzeti, neko će dobiti prijavu. Znači, mogu shvatiti da nema goriva i vozila kako bi se došlo u Soko ili Orahovicu, ali ne mogu shvatiti, a provjerio sam da nema dopisa ni prekršajne prijave, da se neko ne prijavi po sigurnosti saobraćaja iz MUP-a. To vjerovatno treba da uradi rukovodni kadar ili vođa sektora saobraćajnog i dopisom prema Općini da naloži da se nešto otkloni. Općina je nadležna za to. I odavde volio bih da radio prenese sve, kad neko ošteti vozilo da tuži Općinu, jer je ona nadležna za održavanje puteva po Zakonu o cestovnom prometu.“

Esad Tursunović:

„Dosta bih ja stvari rekao ali ne smijem, ići će protiv mene kao u tursko doba „kadija te tuži, kadija ti sudi“. Kolega Hasan je sve stvari u pravu, ali idem prema načelniku što se tiče parkinga. Idem sa inicijativom da se oduzme parking od nadležne institucije kojoj je dodijeljen. Zašto? Šta je urađeno u zadnjih 20 godina da se poboljša parking? Prvo ne znam ko naplaćuje parking, žao mi je tih ljudi što po hladnom vremenu i pod svim lošim uvjetima rade, a nemamo nigdje ništa riješeno.. Ništa.“

Općinski načelnik, Nusret Helić:

„Neću puno, ali su me neka pitanja ponukala da se javim. Pitanja su bila na početku sjednice i dat ću neke odgovore. Ako se sjećate i prošlu sjednicu sam rekao da kad su parkinzi u pitanju u toku je tender vezano za uređivanje, pitanja nabavke parkomata i vjerovatno na sljedećoj sjednici Općinskog vijeća će biti određena odluka. Završene su procedure i dolazi projekat kojeg su radile četiri općine zajedno. Dolazi za prvi krug 10 parkomata, dakle uvodi se sistem i sve će biti određeno odlukama i procedurama, pa i ko će upravljati time. Tako da će se riješiti, a vi znate ko upravlja parkinzima i neka upravlja, bolje je nego da nema niko. Ali hoću reći i ovo Hasanu. Jest Općina nadležna za puteve, ali kad ja kažem vama niste vi u MZ-i nadležni, ja sam odgovoran, odnosno Općina i nećete vi raspoređivati sredstva, dajte mi za posipni materijal 4.000,00 KM u Soko, ne nećete u bukvalnom smislu, nego imaju prioritete. Tačno je da mi odgovaramo i zato ako se sjećate kad god sam ustao ovdje i rekao ne mogu jednostavno podijeliti pare za održavanje puteva i evo, vi ćete tamo podijeliti, a mi ćemo odgovarati. Slažem se da ima problema, slažem se da ima tih rupa, a budžet mi usvojismo prije mjesec dana. Niste rekli da treba izdvojiti sada za signalizaciju

100.000,00 KM, zato što nemamo dovoljno para. Znamo mi šta treba uraditi u ovoj Gračanici, šta treba u MZ-a, ali jedno po jedno. Recite mi odakle, a rupe se začepljaju svake godine i ono za održavanje puteva u gradu i ide samo za začepljanje tih udarnih rupa itd., ali one se i dalje otvaraju i bit će ih. Dakle, lahko je kritički nastupiti, valja raditi i u skladu sa parama i sa nekim prioritetima. Slažem se krađu se ti šahtovi, svako jutro je 3-4 manje. Odakle sad meni 500,00 KM za svaki da odmah intevenišem, nego se evo i Vodovod i svi mi snalazimo. Ima problema slažem se, ali nije rješenje samo reći udarna rupa postoji što nečelnik ne zatvori. Načelnik nema odgovarajući sredstava da to, sve funkcionise onako kako treba, ali ćemo se potruditi da bude što manje i udarnih rupa i problema. Hvala Bogu da se neko stanje mijenja. O bezbjednosti saobraćaja neću, vi ste puno govorili ali ima još prostora da bude bolje. Uvažavam i sve probleme sa materijalnim sredstvima, sramota je. Ja sam se nudio da dam pa mi kažu, nećemo mo od tebe za gorivo, nećemo to je nečija tamo sramota. A nije sramota kad neko pogine, a evo mi ćemo i oko stepeništa poduzeti nešto jer ne možemo to gledati, a naši ljudi tu dolaze. Ako gledamo ko je nadležan, mnoge stvari će nam ovdje pobjeći. Ako čekamo da Ministarstvo riješi neke probleme u škole mi ovdje ne bi imali koliko hoćete stvari. Ali mi smo tu, živimo u toj sredini i valja nam u ovoj složenoj državi i u složenim ekonomskim uslovima i mi neke stvari našim sredstvima rješavati. Ja bih bio najsretniji kad bih mogao da kažem školstvo je tamo, i mi brinemo ali oko 200.000,00 za održavanje, jer je to toliko i da u toku godine, ali ne možemo tako jednostavno. Stoji to sve i valja jedno po jedno rješavati.“

Hasan Puškar:

„Da je bogdom u Soko 4.000,00 KM za posipanje. Nemojte spominjati Soko, a na moju sreću imam budžet ovdje i evo zašto to ne može pod stavkom - komunalno održavanje 190.000,00, zanači Komus ima ingerenciju i u sklopu svoje nadležnosti da nekoliko udarnih rupa koje su toliko značajne riješi. Ima i održavanje ulica u gradu. Ne interesuje me gdje odu pare, pare imaju. Nije niko tražio da se postavi 100.000,00 KM signalizacije, ali znak, i to je na sramotu i policiji i Općini. Znak kod Druge osnovne škole, direktno ugrožava bezbjednost saobraćaju učenika. Znak je bio deset na sat ograničenje, kad je bio usporivač brzine, koji ne postoji pet godina. I za ovom govornicom sam iznosio inicijativu da se tu poveća brzina na ovom mjestu, zato sve autoškole danas uspore na deset. Moram naučiti kandidata da u subotu ne padne. Svi učesnici u saobraćaju pretiču tu i ko je odgovoran kad neki učesnik tu pregazi neko dijete koje prolazi ispred autoškole. Zbog pogrešne signalizacije. S jedne strane 10, s druge strane nema nikakvog znaka. Sredstva imaju, na godišnjem nivou ona ne prelaze više od 10.000,00 KM za udarne rupe, ali se to mora nekako riješiti. Rešetka, pet godina i Vi načelniče idete preko te rupe, pa ako je neće niko napraviti dajte mene ovlastite pa ću ja sutra to uraditi ili je zabetonirati. Za taj dio ima sredstava. Znajte, sutra kad neko nastrada odgovorna je Općine ili neko u Općini.“

Esad Tursunović:

„Načelniče, dobro znate za probleme parking službe jer smo doskora možda čak i danas imali auto pijacu u po Gračanice. Deset auta se prodaje. Ja odgovorno tvrdim, šta je urađeno za ovih dvadeset godina. Šta je uradila služba koja gospodari parkiranjem? Koje su njene nadležnosti? Jesu li oni mogli da kupe kandže. Neće da se parkira i tako lagano policija kruži ko kobac samo na onim autima koja se parkiraju na 10-15 minuta. Mi u Gračanici nemamo gdje parkirati, ljudi koji dođu na 10-15 minuta, uvrh glave pola sata ili sat, šta se dešava, odmah je kazna. Zna li koliko nam para ide, osiromašise nam ljudi radi parkinga, a parking imamo i zato odgovorno tvrdim, treba oduzeti zbog načina kako gospodare. Dosta više javašluka. I tražim ovdje, a nisam mislio nikako govoriti, tematsku sjednicu u vezi privrede. Dosta nam je više i sijalica i zezancija i svih stvari. Za 2-3 mjeseca nećete imati plata. Nije u meni problem. U mene je privatna firma radim koliko i dokle mogu. Ako je zakon zasnovan na pravu radnika ima li i jedan slučaj u Gračanici da je radnik otpušten ili čak sakcionisan iz državne firme. Nema. Evo ovo je sada ovi upravni odbori. Prošle sjednice sam rekao kad je bilo za upravne odbore, šta oni nude, šta daju, hoće li dati akceptne naloge, odnosno privatne naloge da uđu u te upravne odbore. Ne možemo više ovako raditi. Ne znam tu kako ide papirološki ili proceduralno, tražim tematsku sjednicu za privredu, za ove plate, za sve i za predsjedavajućeg. Je li mi mormao davati 3.000,00 KM za njega. Samo da dospijem sa vremenom napraviti ću sistematski veliku uštedu, možemo napraviti na nivou preduzeća, Općine i

svoga. Dovest ćemo se u lošu situacija, a evo vidite u kakvoj je situaciji Kanton. Ovo vam odgovorno tvrdim.“

Zatvorena je diskusija i Informacija o stanju sigurnosti na području Općine Gračanica u 2013. godini je usvojena jednoglasno sa 26 glasova „ZA“.

Odsutni su: Hasić Mujo, Topčagić Mirzet, Omerdić Mirza i Ahmetašević Jasenka.

TAČKA 4:

INFORMACIJA O UTICAJU ZAKONA O PROMJENI NAMJENE POLJOPRIVREDNOG ZEMLJIŠTA NA POSTUPAK IZDAVANJA ODOBRENJA ZA GRAĐENJE OBJEKATA SA INICIJATIVOM ZA IZMJENE I DOPUNE ZAKONA

Rahim Gadžić je u sklopu ove tačke dnevnog reda iznio stav Komisije za poljoprivredu koja je razmatrala ovu informaciju:

„Da se ova informacija o uticaju Zakona o promjeni namjene poljoprivrednog zemljišta na postupak izdavanja odobrenja za građenje objekata sa inicijativom za izmjene i dopune Zakona proslijedi Ministarstvu poljoprivrede i Ministarstvu prostornog uređenja i zaštite okoliša radi izmjene Zakona o pretvorbi poljoprivrednog zemljišta u građevinsko zemljište. To govorim iz razloga što naši privredni subjekti imaju ogromne poteškoće prilikom dobijanja građevinskih dozvola. Iz tog razloga i Komisija za poljoprivredu je zanjajući da je to Sprečko polje i danas smo dobili jedan papir gdje stoji da je to zemljište jako zagađeno i da se sve manje i manje koristi u svrhu poljoprivrednog zemljišta. Iz tog razloga je i Komisija za poljoprivredu podržala ovakvu jednu informaciju i smatra da Općinsko vijeće treba uputiti inicijativu prema ovim ministarstvima, da izmijeni Zakon o pretvorbi poljoprivrednog zemljišta u građevinsko i da ujedno pomognemo našim privrednim subjektima koji žele graditi u tim područjima.“

Na sjednicu se vratio Mirza Omerdić pa je prisutno 27 članova Općinskog vijeća.

Osman Sulejmanović:

„Klub vijećnika SDP-a je razmatrao ovu informaciju i kao takvu podržava s tim što ovamo u članu 8. predlažemo da ovaj zapisnik inspektora o stanju kvaliteta ne podnosi stranka, to bi trebalo po službenoj dužnosti da se radi. I da se pokuša vidjeti oko naknade 20% za ostale objekte. Mislim da je to previše, ako već hoćemo da pomažemo privredi. Da se proba ovaj procenat smanjiti.“

Mirza Omerdić:

„Evo ja da pohvalim ovu informaciju koju je nadležna služba uradila i zbilja je, bar po mom nekakvom pragmatičnom i praktičnom iskustvu. Dakle, ove izmjene Zakona u članovima 5. i 8. tako bi deblokirale izgradnju na Sprečanskom području. Ja bih još dopunio Gadžića da ovu inicijativu po hitnom postupku naslovimo i na Skupštinu TK, pored ministarstava jer koliko ja znam predlagač tih stvari može biti bilo ko od njih. Ja sam razgovarao sa nekolicinom poslanika u Skupštini, izložio sam im problem onako kako sam ja znao i to dakle više sa ekonomskog stanovišta u principu šta ta zabrana znači za privredu Općine i oni su u principu saglasni da je to otežavajuća okolnost i da bi trebalo dakle, deblokirati tu izgradnju. Slažm se sa kolegom da su naknade možda prvelike za privredni dio 20% i da ide inicijativa o mogućnosti smanjenja te naknade. Istina, ovdje pretvorba poljoprivrednog zemljišta i ono što je veoma važno jeste da ne ide po z.k. ulošku 1/1 nego na temelju posjedovnog lista. Postoje otežavajuće okolnosti jer sam ja imao primjer da je nemoguće iščistiti taj z.k. izvadak bar u brzom vremenskom intervalu. Smrtovnica stala, vlasništvo upisano na jednoj ženi koja je rođena u Kraljevini Srba, Hrvata i Slovenaca i odatle se vuče. Isto tako možda da se pokrene inicijativa da se u okviru ovog dvojnog knjigovodstva izvrši usklađivanje između katastra i grunta, kako bi se jednostavno i taj dio riješio. Čini mi se da Doboj Istok ima taj dio riješen. Evo ja bih zamolio vijećnike da podržimo ovu inicijativu i da uputimo na ove adrese kako bi se što prije riješilo. I čestitam načelniku i Službi što su se zauzeli da u okviru ministarstva pokušaju

razriješiti ovaj problem i čini mi se da to ide jednim dobrim tokom, a evo ovo bi možda bio naš doprinos da stvar dovedemo na čistac.“

Općinski načelnik je podržao sve što je predloženo, te u sklopu ove tačke dnevnog reda predložio Općinskom vijeću Zaključak sljedeće sadržine:

- Zahtijeva se od Skupštine Tuzlanskog kantona da na dnevni red prve naredne sjednice stavi tačku dnevnog reda „Prijedlog Odluke o pristupanju izmjenama i dopunama Prostornog plana kantona“ i time započne postupak međusobnog usklađivanja Prostornog plana kantona sa već ranije donesenim općinskim prostornim planovima.

Prijedlog Zaključka obrazložio je problemom sa kojim se susreće u radu Služba za upravu prilikom vođenja postupka i izdavanja odobrenja za gradnju, a koja traje već osam godina upravo zbog neusaglašenosti Prostornog plana općine Gračanica sa Prostornim planom TK.

Zaključak je usvojen jednoglasno kao i Informacija sa iznešenim prijedlozima od strane vijećnika.

TAČKA 5:

RJEŠENJA I ZAKLJUČCI IMOVINSKO-PRAVNE SLUŽBE

Nije bilo učesnika u diskusiji i rješenja i Zaključak Imovinsko-pravne službe su usvojeni jednoglasno sa 27 glasova “ZA”

Sjednica je završena u 15.50 sati.
Zapisnik vodila: Mevlida Naimkadić
Tonski snimak sjednice uredno je arhiviran.

Mevlida Naimkadić

**PREDSJEDAVAJUĆI
OPĆINSKOG VIJEĆA**

mr.sci. Edin Ibrišević